

REZOLUTË
PËR VLERËSIMIN E VEPRIMTARISË SË INSTITUCIONIT
TË AVOKATIT TË POPULLIT PËR VITIN 2006

Kuvendi i Shqipërisë,

- vlerëson veprimtarinë e Avokatit të Popullit, si një institucion kushtetues i pavarur jogjyqësor, në mbrojtje të të drejtave të njeriut;
- mbështet rolin e këtij institucioni për ngritjen e përgjegjshmërisë dhe transparencës së administratës publike, duke përfshirë organet ekzekutive të gjyqësorit dhe të prokurorisë;
- nxit angazhimin e Avokatit të Popullit në zbulimin dhe denoncimin e shkeljes së të drejtave ligjore të shtetasve nga zyrtarët.

Konstaton:

- Avokati i Popullit ka kryer gjatë vitit 2006 një veprimtari në përputhje me Kushtetutën dhe ligjin në mbrojtje të interesave të shtetasve;
- Avokati i Popullit, në veprimtarinë e tij të vitit të kaluar, u është përmbajtur objektivave të vendosur nga Kuvendi në rezolutën për vlerësimin e veprimtarisë së këtij institucioni;
- vëllimi i punës së këtij institucioni dhe ankesat e shqyrtuara prej tij, në krahasim me një vit më parë, janë rritur, çka dëshmon për rritjen e besueshmërisë së shtetasve ndaj tij;
- performanca e këtij institucioni ka ardhur duke u përmirësuar në mënyrë të vijueshme;
- nismat e reja për të shkuar sa më pranë popullit dhe shqetësimeve të tij si “ditët e hapura” vlerësohen pozitivisht për impaktin që ato kanë dhënë.

Kuvendi kërkon që për vitin 2007 t’u kushtohet vëmendje e veçantë këtyre objektivave:

- rikonfirmimit të bashkëpunimit me Kuvendin për informimin për shkallën e respektimit të të drejtave të njeriut, si dhe për nxitjen e nismave ligjvënëse;
- mbrojtjes së të drejtave të njeriut, nëpërmjet ndjekjes së rasteve me vetiniciativë për grupe të mëdha njerëzish, shtresa në nevojë, pa përjashtuar raste individuale tipike;
- forcimit e bashkëpunimit me shoqërinë civile, OJF-të dhe median, për të ushtruar një presion pozitiv mbi administratën, me synim rrënjosjen e praktikave të mira administrative;
- vazhdimin e organizimit të praktikës frytdhënëse të “ditëve të hapura” për t’iu afruar sa më shumë publikut dhe për të rritur shkallën e ndërgjegjësimit të tij;
- ruajtjes së marrëdhënieve të mira të bashkëpunimit me organizmat ndërkombëtarë;
- denoncimit në vijimësi të shkeljeve të të drejtave të shtetasve nga zyrtarët përgjegjës të administratës shtetërore.

19 mars 2007

REZOLUTË
PËR VLERËSIMIN E VEPRIMTARISË SË KOMISIONIT TË SHËRBIMIT CIVIL
PËR VITIN 2006

Kuvendi i Shqipërisë,

- njeh dhe vlerëson rolin e Komisionit të Shërbimit Civil, që ligji “Statusi i nëpunësit civil” i jep për mbikëqyrjen e menaxhimit të shërbimit civil;
- thekson se ky institucion i pavarur është organi administrativ që cakton ligji për të zgjidhur ankesat në lidhje me nëpunësit civilë;
- këmbëngul në domosdoshmërinë e vendosjes dhe forcimit të marrëdhënieve ndërinstitucionale ndërmjet Komisionit të Shërbimit Civil dhe institucioneve të tjera të përcaktuara në ligj;
- nxit dhe mbështet kryerjen e reformave në administratën publike, në kuadër të zbatimit të Marrëveshjes së Stabilizim-Asociimit.

Konstaton:

- mosmbajtjen parasysh në veprimtarinë vjetore të Komisionit të Shërbimit Civil të rezolutës

së Kuvendit të 16 shkurtit 2006 dhe të detyrimeve që ky institucion duhej të përmbushte vitin e kaluar në ushtrimin e funksionit të tij ligjor;

- tejkalimin përsëri të kompetencave të veta ligjore nga Komisioni i Shërbimit Civil, çka tregon se ky institucion ende s'e ka të qartë funksionin e tij në raport me institucionet e tjera;

- shfaqje të mungesës së objektivitetit dhe rritje në mënyrë artificiale të numrit të ankesave të nëpunësve civilë ndaj administratës publike edhe në rastet e ristrukturimeve të institucioneve qendrore;

- kundërvënie ndaj rekomandimeve të Kontrollit të Lartë të Shtetit për marrjen e masave disiplinore ndaj nëpunësve civilë të larguar për shkelje të ligjit;

- njëanshmëri politike dhe subjektivitet në formulimin e raportit vjetor për veprimtarinë e këtij institucioni.

Kërkon për vitin 2007:

- zbatimin rigoroz të detyrave të përcaktuara për Komisionin e Shërbimit Civil në ligjin "Statusi i nëpunësit civil";

- vendosjen e një platforme të qartë për mbështetjen e reformave dhe rritjen e performancës profesionale e të ndershmërisë në administratën publike, në funksion të arritjes së standardeve të domosdoshme për integrimin e Shqipërisë në Bashkimin Europian;

- hartimin e rekomandimeve dhe ndjekjen e tyre për përmbushjen e sugjerimeve të dhëna në nivel qendror e vendor;

- bashkëpunimin me Këshillin e Ministrave dhe me institucionet e tjera për kryerjen e reformave në administratë, në përputhje me statusin e nëpunësit civil;

- përmirësimin e rolit të Komisionit të Shërbimit Civil për mbikëqyrjen e menaxhimit të burimeve njerëzore në administratën e pushtetit vendor.

19 mars 2007